



Bosna i Hercegovina, Federacija Bosne i Hercegovine, Srednjobosanski kanton/
Kanton Središnja Bosna, 72270 Travnik

PRAVILNIK O MEĐUNARODNOJ SARADNJI UNIVERZITETA U TRAVNIKU

(Prečišćeni tekst)

Travnik, avgust 2018. godine

Na osnovu člana 64. Zakona o visokom obrazovanju (Službene novine SBK/KSB 4/13) i člana 58. Statuta Univerziteta u Travniku, Senat Univerziteta u Travniku je na sjednici održanoj dana 30.8.2018. godine donio

**PRAVILNIK O MEĐUNARODNOJ SARADNJI
UNIVERZITETA U TRAVNIKU
(Prečišćeni tekst)**

I OSNOVNE ODREDBE

**Član 1.
(Predmet)**

Pravilnikom o međunarodnoj saradnji (u daljnjem tekstu: Pravilnik) uređuju se osnovna načela saradnje sa partnerskim Univerzitetima, saradnju sa institucijama i organizacijama koje uspješno razvijaju naučno-istraživačku djelatnost, saradnju u nastavnim planovima i programima studija u sva tri ciklusa studiranja, razvoja zajedničkih programa studiranja, mobilnosti dolaznih i odlaznih studenata, naučno-nastavnog i nenastavnog osoblja na Univerzitetu u Travniku (u daljnjem tekstu: Univerzitet), vrsta i trajanje mobilnosti, postupak prijave, osnovne isprave, prava i obveze studenata, naučno-nastavnog, i nenastavnog osoblja, uloga ECTS/Erasmus koordinatora na Univerzitetu, kao i druga pitanja vezana za provedbu programa međunarodne saradnje.

**Član 2.
(Ciljevi međunarodne saradnje)**

Međunarodna saradnja podrazumijeva:

- razvoj saradnje sa partnerskim Univerzitetima,
- razvoj saradnje sa institucijama i organizacijama koje uspješno razvijaju naučno - istraživačku djelatnost,
- razvijati saradnju u nastavnim planovima i programima studija u sve tri ciklusa studiranja,
- razvijati zajedničke programe studiranja,
- omogućiti studentima da dobiju dvojne diplome, naročito sa afirmiranim europskim univerzitetima,
- stvaranje uslova u bilateralnim i multilateralim naučno-istraživačkim programima,
- podršku organiziranja međunarodnih naučnih konferencija kao i učešće naših nastavnika i saradnika u inostranstvu na naučno - stručnim konferencijama,
- podsticanje gostujućih predavanja inostranih profesora,
- podsticanje učešća stranih profesora u pisanju naučnih radova koji će se objavljivati u našim naučno - stručnim časopisima,
- održati pisanje i objavljivanje naučno - stručnih članaka u priznatim međunarodnim časopisima,
- realizovanje mobilnosti studenata kako u odlasku naših studenata na inostrane Univerzitete tako i dolasku stranih studenata,
- organizacije mobilnosti profesora, asistenata i drugih naučno - stručnih saradnika, ostvariti razmjenu stručnih časopisa i literatura.

Međunarodna saradnja se razvija kao redovan zadatak nadležnih institucija naročito kroz učešće u međunarodnim projektima a posebno kroz razne programe Europske unije.

Član 3.
(Etički kodeks i pravni propisi)

Osobe uključene u program međunarodne saradnje dužne su poštovati etički kodeks i propise Univerziteta i institucija sa kojima ostvaruju saradnju.

II URED ZA MEĐUNARODNU SARADNJU

Član 4.
(Ured za međunarodnu saradnju)

Programe međunarodne saradnje na nivou Univerziteta provodi i administrira Ured za međunarodnu saradnju Univerziteta u saradnji s prorektorom za međunarodnu saradnju i razvoj. Na prijedlog prorektora za međunarodnu saradnju i razvoj rektor Univerziteta imenuje univerzitetskog ECTS/Erasmus koordinatora.

Strategiju međunarodne saradnje Univerziteta u Travniku stvaraju i provode Senat Univerziteta, prorektor za međunarodnu saradnju i razvoj, Ured za međunarodnu saradnju Univerziteta, te prodekani i uredi odnosno osobe zaduženi za međunarodnu saradnju na fakultetima.

Član 5.
(Cilj Ureda za međunarodnu saradnju)

Ured za međunarodnu saradnju Univerziteta u Travniku osnovan je s ciljem koordinacije aktivnosti i razvoja međunarodnih odnosa s partnerskim Univerzitetima i ostalim univerzitetskim institucijama u Europi i svijetu.

Član 6.
(Aktivnosti Ureda za međunarodnu saradnju)

Aktivnosti Ureda za međunarodnu saradnju su:

- razvoj međunarodnih odnosa s partnerskim Univerzitetima u svijetu,
- razvoj međunarodnih odnosa s institucijama i organizacijama širom svijeta čija aktivnost je vezana za područje visokog obrazovanja i naučno-istraživačkog djelovanja,
- poticanje i koordiniranje procesa mobilnosti studenata, nastavnog, istraživačkog i nenastavnog osoblja u oba smjera,
- razvoj aktivnosti vezanih uz međunarodne edukativne i istraživačke projekte,
- saradnja s akademijama i fakultetima Univerziteta u Travniku s ciljem poboljšanja uslova za odvijanja međunarodnih aktivnosti,
- izrada međuuniverzitetskih i istraživačkih projekata i saradnja u organizaciji međunarodnih konferencija

Član 7.

(Područje djelovanja Ureda za međunarodnu saradnju)

Ured za međunarodnu saradnju djeluje na sljedećim područjima:

a) Bilateralni sporazumi:

- savjetodavna, administrativna i organizaciona pomoć pri sklapanju ugovora,
- podrška istraživačkim projektima,
- organizacija međunarodnih naučnih konferencija,

b) Mobilnost:

- organizacija studentske razmjene,
- administrativna i organizacijska pomoć stranim studentima na razmjeni na Univerzitetu u Travniku,
- administrativna i organizacijska pomoć domaćim studentima koji idu u razmjenu na inostrane Univerzitete,
- organizacija razmjene profesora, istraživača i saradnika,
- organizacijska pomoć pri osiguravanju smještaja za posjete stranih gostiju,
- organizacija posjeta Univerzitetu visokih zvaničnika međunarodne zajednice, diplomatskog kora, rektora inostranih Univerziteta i rukovodioca istraživačkih i drugih organizacija,
- ažuriranje podataka o realizovanim aktivnostima iz oblasti međunarodne saradnje,
- posredovanje u uspostavljanju partnerskih kontakata vezanih za sudjelovanje u međunarodnim projektima,
- koordinira aktivnosti Univerziteta i njegovo učešće u aktivnostima u organizacijama i mrežama čiji je član, te posredovanje u pripremnim aktivnostima stupanja u članstvo Univerziteta u nove organizacije i mreže,
- upravljanje naučnim i razvojnim projektima dodijeljenim uredu za međunarodnu saradnju.

c) Ured prikuplja i obrađuje informacije o svim oblicima međunarodne saradnje Univerziteta i organizacionih jedinica i o tome podnosi najmanje jednom godišnje detaljan izvještaj Odboru za kvalitet Univerziteta.

Član 8.

(Prorektor za međunarodnu saradnju i razvoj)

Prorektor za međunarodnu saradnju i razvoj organizuje rad i samostalno rukovodi Uredom i odgovoran je za obavljanje slijedećih poslova:

- rukovodi i koordinira aktivnostima na nivou Univerziteta koje se tiču utvrđivanja Strategije razvoja međunarodne saradnje Univerziteta i njenom implementacijom;
- prati realizaciju, predlaže i poduzima mjere za poboljšanje infrastrukture naučno-istraživačkog rada u oblasti međunarodne kooperacije;
- na nivou Univerziteta prati i koordinira realizaciju zaključenih sporazuma iz oblasti naučno-istraživačkih, istraživačko-razvojnih i drugih projekata;
- istražuje i iznalazi mogućnosti za apliciranje Univerziteta i njegovih organizacionih jedinica na različite naučno-istraživačke, istraživačko-razvojne i druge projekte i o tome pruža adekvatne i blagovremene informacije;

- preduzima radnje u svrhu stvaranja uslova za stimulisanje mladih istraživača, sa ciljem njihovog akademskog napredovanja i optimalnog osposobljavanja za uključanje u realizaciju međunarodne saradnje kroz naučno-istraživačke, istraživačko-razvojne i druge projekte;
- kreira i preduzima adekvatne aktivnosti, uključujući i sačinjavanje i podnošenje odgovarajućih prijedloga nadležnim organima Univerziteta kojima se unapređuje međuuniverzitetska saradnja u cilju doprinosa za optimalno korištenje postojećih znanja i njihove osavremenjene primjene u svim oblicima nastavnog i naučnog djelovanja;
- rukovodi i koordinira aktivnosti na nivou Univerziteta koje se tiču utvrđivanja Strategije razvoja međuuniverzitetske saradnje u zemlji i inostranstvu i njenom implementacijom;
- preduzima aktivnosti i mjere na nivou Univerziteta radi uspostavljanja optimalne i poželjne saradnje sa drugim univerzitetima u zemlji i inostranstvu;
- inicira i koordinira na nivou Univerziteta izradu, usvajanje i implementaciju planova i programa stručnog usavršavanja nastavnika i saradnika na drugim univerzitetima u zemlji i inostranstvu;
- preduzima sve potrebne aktivnosti i mjere na nivou Univerziteta kojima se obezbjeđuju uslovi za naučne i stručne kontakte koji za cilj imaju razmjenu naučno-nastavnih kadrova i studenata;
- uspostavlja saradnju sa ambasadama stranih zemalja u cilju realizacije interesa Univerziteta u oblasti nastavno-naučnog i istraživačkog procesa;
- inicira i koordinira na nivou Univerziteta aktivnosti i mjere, uključujući i prijedloge nadležnim organima, koje su usmjerene na uspostavljanje saradnje u zajedničkim projektima sa univerzitetima u zemlji i inostranstvu;
- predlagač je općih i pojedinačnih pravnih akata, koji su u vezi sa međuuniverzitetskom saradnjom;
- realizira mobilnost studenata i akademskog osoblja;
- najmanje jednom godišnje podnosi izvještaj o svom radu Rektor i Senatu;
- učestvuje u pripremi sjednica Senata;
- obavlja i druge poslove koji po svojoj prirodi spadaju u nadležnost Ureda za međunarodnu saradnju i po nalogu Rektora.

Član 9. **(ECTS/Erasmus koordinator)**

Na prijedlog prorektora za međunarodnu saradnju i razvoj rektor imenuje ECTS/Erasmus koordinatora.

ECTS koordinator je odgovoran za provjeru kompatibilnosti studijskog programa i opisa kolegija koje je student odabrao na stranoj ustanovi s nastavnim planom i programom na Univerzitetu.

Erasmus koordinator je odgovoran za mobilnost na osnovu konkretnog ERASMUS bilateralnog ugovora te za komunikaciju s Agencijom s ciljem uspješnog i pravilnog provođenja programa Erasmus.

III MOBILNOST STUDENATA

Član 10. (Mobilnost studenata)

Mobilnost studenata odnosi se na studiranje na instituciji domaćinu nakon čega se student vraća na matičnu instituciju i nastavlja upisani studijski program. Mobilnost studenata uključuje studijski boravak ili stručnu praksu u sklopu redovnog prvog, drugog i trećeg ciklusa studija.

Mobilnost studenata se ostvaruje u okviru institucionalnog sporazuma, programa dostupnih Evropskoj Uniji i drugih programa koje Bosna i Hercegovina i Univerzitet mogu koristiti.

IV MOBILNOST OSOBLJA

Član 11. (Mobilnost osoblja)

Mobilnost nastavnog osoblja odnosi se na boravak zaposlenika matične institucije (u daljnjem tekstu: osoblje) na instituciji domaćinu nakon koje se zaposlenik vraća na matičnu instituciju.

Osoblje u mobilnosti uključuje:

- a) osobe zaposlene temeljem ugovora o radu na Univerzitetu i njegovim organizacionim jedinicama u zvanjima: naučno-nastavno, umjetničko-nastavno, naučno, nastavno, saradničko zvanje asistenta ili višeg asistenta (sve obuhvaćeno pojmom naučno-nastavno osoblje),
- b) nenastavno osoblje (stručno i administrativno osoblje) zaposleno na osnovu ugovora o radu na Univerzitetu i njegovim organizacionim jedinicama.
- c) spoljni saradnici koji su zaposleni na osnovu ugovora o djelu na Univerzitetu i njegovim organizacionim jedinicama ne ispunjavaju uslove za mobilnost i finansijsku podršku u svrhu boravka na inostranoj visokoškolskoj instituciji.

V PRELAZNE I ZAVRŠNE ODREDBE

Član 12. (Stupanje na snagu)

Ovaj Pravilnik stupa na snagu osmog dana od dana donošenja, a primjenjuje se od početka akademske 2018./2019. godine.

Član 13. (Sadržaj prečišćenog teksta)

Prečišćeni tekst Pravilnika o međunarodnoj saradnji Univerziteta u Travniku obuhvata Odluku o izmjenama i dopunama Pravilnika o međunarodnoj saradnji Univerziteta u Travniku broj 552/18-2 od 26.7.2018. godine.

Broj: 588/18

Datum: 30.8.2018. godine

Rektor

prof. dr. Rasim Dacić

